



Departamento di Prensa
di
Conseho di Minister
Tel: (297) 826339 Fax: (297) 829816

COMUNICADO DI PRENSA

GABINETE EMAN II TA KEDA DEMISIONARIO

Gobernador a tuma e desicion pa gabinete Eman II keda demisionario te eleccion dia 12 di December awor. Esaki tabata e otro desicion cu a keda pendiente despues cu anteriormente Gobernador a dicidi cu ta desolve Parlamento y decreta eleccion pa dia 12 di December. Tur e desicionnan aki ta conforme nos constitucion y custumber ya estableci. E desicion pa gabinete Eman II keda demisionario ta duna seguridad cu tur asunto pendiente ta sigui na un forma ordena y sin interupcion innecesario. Algo cu lo por tabata hopi diferente si a pone un gabinete politico di otro asignatura of un gabinete di experto, cu no ta na altura di tur e asuntonan andando. Esaki lo a causa tardansa y confusion cu no ta necesario awor aki.

Riba e pregunta kiko e tarea di gobierno den un situacion asina ta, Minister Presidente Henny Eman a splica lo siguiente: *"Nos tarea ta pa atende tur e asuntonan coriente. Awor aki esaki ta importante pasobra nos tin un gran cantidad di asuntonan pendiente cu ta di importancia grandi pa nos pais. Desicionnan a worde tuma den pasado, pero nan mester worde ehecuta debidamente. Ta pesey den e proceso di ultimo dianan cu nos a pasa aden, nos huristanan y esnan di gobernador y Gobernador mes tambe cu ta hurista, a studia e asuntonan aki seriamente, pa motibo cu e desicionnan den asuntonan aki por tin consecucionan hopi serio. Asina a yega na e conclusion cu mester desolve parlamento pero mester keda cu un gobierno demisionario cu sa ta kiko ta andando, pa sigura cu Aruba no ta bin den problema si Bo a bai den direccion cu algun hende tabata desea. Pesey Gobernador a haci un apelacion riba nos pa nos atende asuntonan coriente pa despues di eleccion un gobierno nobo worde nombra."*

PRIORIDADNAN DEN GOBERNACION

Entre e cantidad grandi di asuntonan cu ta pendiente Minister Presidente a menciona e siguiantenan; *"Nos mester percura pa Air Aruba. Nos a tuma un desicion caba den pasado cu nos mester tene na bida. Esey ta un asunto complica cu mester di atencion continuo. Nos a haci un apelacion riba Banco Central y Departamento di Finansa pa haci un estudio rapido y profundo di nos situacion di liquidez. Nos ta yegando 1998 cu un otro set-up di presupuesto. Un presupuesto balansa. E problema di liquidez ta uno cu mester sigui atende. E ta un asunto andando cu si Bo haña hende nobo cu no sa suficiente di e asunto aki, nan no lo por atende e asunto aki. AZV ta den e proceso di worde introduci. Probablemente e lo sufri un poco tardansa pa motibo di e caracter demisionario di Gobierno. Sinembargo e proceso mester sigui. E desicionnan a worde tumá y nan mester worde ehecuta. Esaki ta algun di e puntonan grandi cu tin andando. Tin hopi mas cu mester di atencion continuo."*

Aruba, 16 September 1997